


NDELE OKUDJA EFIMBO OLO

 Oshiwa shili oku aluka noku uda mumwatate, omufitaongalo, ta yandje ehokololoumbangi lefilonghenda laKalunga, nokakadona kaye. Ongaashi ashike Omwene Jesus, oku ninga oinima i li ngaha. Oshili lela.

² Paife, otwa hafa unene, konguloshi, oku kala tu na pamwe nafye, umwe womovaenda vetu apa, ngaashi hatu li ifana, elongelokalunga lomailikano konguloshi mOmudo Mupe, kaume kange muwa, Mumwatate Ernie Fandler, umwe womovalidilululi kOmwene Jesus Kristus, oshixuulwa shefilonghenda. A tota eumbo laye moSwitzerland, oko a dja. Ndele onda itavela, mumwatate pamwe naye kwinya, ovo hava di paife moShawano, Omundowishi pakudalwa, Mumwatate Waters. Otwa hafa oku kala tu va na pamwe nafye konguloshi.

³ Hano otu na, yo, pamwe nafye konguloshi, mu—mumwatate omuholike meitavelo, South Africa, Mumwatate David duPlessis. Otwa hafa oku kala tu mu na pamwe nafye, yo. Ndele otwa . . . David naame otwa—otwa teelega, ile twa ilikana, ndele Omwene okwe tu pa oshilonga shinene pamwe, momudo twa yuka, moAfrica nomoitopolwa ya yooloka younyuni. Mumwatate David oku li apa paife oku shi popya, noku shi ilikanena, pokati kopaike nOmaandaxa, oku tokola kutya onaini nopeni, mo—moAfrica, noku ya moitopolwa ya yooloka younyuni. Ngaashi, Mumwatate David oku na ombelewa ya fimana nOnhanda yOunyuni yOpentekoste, nosho yo oya shiivika nawa novaleli vahapu ovakwamhepo vanene mounyuni aushe. Ndele okwa kala unene enwefemo moku udifa ko noku etifa, ngaashi tu li ngaha paife, oku kwafa oku etifa Olutu laJesus Kristus kumwe, omaukwaongalo aeshe meitavelo. Shihe na kutya (vo) ove na ongeleka ilipipo, ile (vo) oshilimbo shilipipo va dengwa. Okutya, Ongeleka, Oyo Kristus a fila.

⁴ Ndele onde shi lipula luhapu. Onda li handi lifa eengobe, oikando ihapu, kOuninginino. Otu na ko, naMumwatate David, noku kala omutumba oku hava shingile eengobe monhokolo yolumbo, meemhunda, oku di palula mo . . . nadi nape moulifilo, o . . . wofuka. Fimbo, olusiana tali mene koshi, olusiana lomoixwa. Hano ohava tete olusiana, noku palula eengobe momukokomoko—momukokomoko wefimbo lokufu, eshi ku na unene eandu, meemhunda.

⁵ Ndele ohatu kala omutumba konghambe noku tala omunahambo ta eta mo eengobe; nohambo keshe, konima, oyo tai dulu oku mena otona yohavala. Nge ova menifa eetona omilongonhano dohavala, otashi ti otava dulu oku tula mo eengobe omilongonhano. Nge otava dulu oku menifa eetona

eyovi dohavala, otashi ti oufita eyovi weengobe tau dulu oku ya mo. Omulumenhu keshe, okwa humbata oshilimbo sheengobe daye. Ohava tale oilimbo, shoshili, eehambo da yooloka, opo vehe di lumbakanife. Ndele hano ngeenge o . . .

⁶ Omunahambo, ka li e na ko na sha kutya oludi lilipi tali i mo, molwaashi opa li omaludi aeshe. Ashike ope na oshinima shimwe osho e na shili oku konakona, osho sha li okapapa kohonde. Ope noku kala va shangifwa oHereford, ile ita di pitile mo moshivelo. Ohave di shunifa ko. Uwete?

⁷ Ndele ohandi lipula kutya oo omukalo tashi kala kEpagulo. Itashi kala oludi lilipipo twa djala, ashike nge okapapa kOhonde oko ke li. Osho oshinima tashi—tashi valulwa, okapapa kOhonde.

Ndele onda hafa unene oku kala tu na Mumwatate David pamwe nafye.

⁸ Ndele ondi wete Mumwatate Estle Beeler a li apa okafimbo ka ya. Onde mu mona ta yambuka konima oko, a dja kumwe. Novalongi vakwao ovo twa teelesa oku uda kuvo, konguloshi. Ndele, hano, nondi wete kutya Mumwatate Ruddell navo otave ke uya mo, shaashi otava kala mo fiyo omokati koufiku.

⁹ Nande ongaho, Mumwatate David ita dulu oku kala po fiyo omokati koufiku. Omulumenhu ta hakanwa, keshepamwe. Ndele diva eshi Mumwatate Rodgers a uda kutya oku li oku, oshike, ota tumu noku kala e mu na kwinya pomulongo. Hano tashi ti ota di po apa, diva diva, aye kwinya koumbuwanhu waLouisville.

¹⁰ Ndele onde lipula otashi kala shiwa, nge oshi li nawa ku Mumwatate David, nge—nge ohatu mu eta ko noku popya osho shi li momutima waye, e tu udifile, a ninge keshe tuu Omwene ta yandje. Atushe otwa hala oku uda Mumwatate David duPlessis, okudja koSouth Africa.

¹¹ Nandi tye ngaha. Kutya, eshi nda li mo, mwinya moAfrica, moshikonga shange shinene Omwene e tu pa oko, mumwaxe okwa li omufatululi wange, Mumwatate Justus. Onda itavela edina laye oMumwatate Justus. Ndele ovakwaneumbo vawa shili, ava ovamwaxe vaduPlessis. Ohandi lipula ope na . . . Ndi wete aveshe ovalongi, ngaashi ndi shii, ndele pamwe axe, yo, oo a li omulongi. Ndele ova dja movakwaneumbo vawa. Ndele Mumwatate David okwa humbata edina liwa mokati keengeleka adishe nomaukwaongalo mounyuni.

¹² Ndele Mumwatate David, onda hala u uye ko paife noku popya nafye, ile keshe tuu Kalunga a tula momutima woye oku tonga. Ila. Ndele onda hafa unene oku ku shiivifila ongeleka, konguloshi. Ou oMumwatate Orman Neville, omufitaongalo wetu. Ndele kongeleka, ou oumwe womookaume kange vawa, no—nomapendafule makwetu moshilonga shaKalunga, Mumwatate David duPlessis waSouth Africa. Kalunga ne ku yambeke, Mumwatate David.

13 [Mumwatate David duPlessis ta popi. Okanhele kehe na sha mokateipa—Sd.] . . . popya. Amen. Atushe osho twa ninga. Mumwatate David, endelega u shune noku kala pamwe nafye vali. Oshiwa lela. Otwa hafa shili.

14 Mumwatate David okwa tonga po oinima inwe, onda hala ngeno okwa li ndi na opena yange, ngeno onde i shanga. Ashike alushe ohandi kala noku dimbulukwa “ovatekulumati; ovatekulu.”

15 Iya, otwa pandula shili etalele po lamumwatate wetu. Ndele okwa . . . okwa li o . . . a kwatakanekwa nOshiongalele shOunyuni shovaitaveli vOpentekoste, novanenenhu momulandu woilonga yaye mounyuni aushe. Ndele fye ovanamhito, konguloshi, oku kala tu na Mumwatate David e uya oku popya nafye monguloshi ei yOmudo Mupe. Ndele oto mono kutya oshike ovanenenhu ohave lipula kombinga yOmwene wetu, lipula kombinga yomupiya Waye munene.

16 Paife onda itavela kutya, mongula, oku kala Omudo Mupe, eetundi ashike dishona paife. Ndele ondi noku dja po ongula inene, hano onda diladila ohandi popi ashike kashona, nge oshi li nawa naMumwatate Neville. [Mumwatate Neville ta ti, “Eheno. Amen.”—Sd.] Mumwatate Beeler, novalongi vakwao ve li apa. Itandi kwata efimbo lihapu. Ndele onda diladila, nge natu tye “Amen,” noku ya keumbo, otashi kala etumwalaka liwa. Ndele ohatu dulu oku pandula Omwene kwaashi tu na apa, konguloshi.

17 Ndele paife, ashike eshi oshi li onguloshi yOmudo Mupe, ohatu lityapula ashike, mOuhamba waKalunga, mokuudifa, nafiyu Omudo Mupe we uya. Ndele ondi na . . . oku penduka ongula, inene shili, manga inaku sha. Ndele ame nghi fi omunyasha ngaashi David. Pamwe nghi . . . Pamwe nghi udite omunyasha ngaashi ye. Ye o . . . Shaashi, David okwa—okwa kula kashona e dule nge. Ohandi lipula okwa kula naheyali ile omido hetatu, pamwe omulongo. Ashike ye omutemo waKalunga, ta ende eemaila omayovi omilongonhano omudo ou, molwa Ouhamba waKalunga. Mondjila yaye paife oku ka udifa kuMumwatate Rodgers, nomongula okuvamwe, kumwe kulili, nokumwe kulili, nokumwe kulili, noku alukila apa vali mOmaandaxa. Ndele ondi noku mu shakeneka oku ninga omalongekido olweendo tali ya paife lounyuni aushe.

18 Ndele otu noku kala moAfrica, onda uda omutenya ou, muMalisa, Malisa ou—ou te uya. Ondi noku shakeneka Clayton Sondmore, okudja kOngeshefa yOvalumenhu Ovakriste vEvaengeli Liyadi, oshivike eshi, ile moshivike eshi tashi uya, oshitopolwa shasho shotete, noku ninga omalongekido aJamaica, yaHaiti. Ohandi i oshivike sha shikula moKentucky, ile mwinya moGeorgia, oku kala noiongalele kwinya. Oku aluka ko noku uya moKentucky, oufiku apa, noufiku kwinya, oku kwata eengeleka edi. Noku aluka nda yukilila keumbo

oku dja oko, noku ya ko—ko—koAtlantic City, oku hovela mo27, okuya meti30, noku dja ko ongula ya1, noku hovela mo—moKingston, Jamaica, kosh- . . . oshikoto shomafiyafano, onguloshi oyo, omafiku omulongo oiongalele oko. Ndele oku dja opo, oku ya moHaiti hano, nakeshe tuu. Katu shii oku ha twii oku dja opo, ongaashi ashike Omwene te tu wilike.

¹⁹ Paife, aishe ei oi li moku ningwa. Uwete? Inandi tya eewa. David opo e li apa, Clayt ote uya. Gordon, Mumwatate Gordon Lindsay ote uya, molwa koSouth America. Na—naaishe, yOvanangeshefa Ovalumenuh Ovakriste molwa oku popya Oshilatina America. Ndele Mumwatate David omolwa Switzerland, Ndowishi, shatwikila. Ashike katu shi shii natango. Twikila oku ilikana. Inandi hala oku ya kumwe nafiyo Kalunga a tya inda, nokeshiivo lange. Onghee hano, nge ondi udite nda wilikwa oku ya, hano ngeenge handi di mo modila, ohandi. . . . Ndele kutya ne ounamhinge oufike peni, ohandi ti, “Onde uya mEdina lOmwene Jesus.”

²⁰ Onda pandula lela David, oukaume ou tu na pamwe, molwaashi omulumenhu oku li omulumenhu a fimana unene, ashike okwa—okwa—okwa itavela lelalela oshilonga eshi shOmwene. Okwa itavela lelalela. Ndele—ndele omadina etu okwa kwatakanifwa kumwe mounyuni aushe paife, Mumwatate David naame.

²¹ Ndele onda hafa unene oku kala nekwatafano nomulumenhu a tya ngaha. Ashike, ookaume, onde shi pandula. Ashike oshinima shinenenene handi diladila oku kwatakanifa oJesus Kristus, Omona waKalunga, Umwe oo munene.

²² Paife, Mumwatate Neville navamwe vomuvo otava ka popya mokafimbo kanini, ashike onda hala oku lesha okanima kashona mOmushangwa paife.

²³ Ndele oshiwa, ohandi diladila, monguloshi yOmudo Mupe, oku mona ovaudifi va yooloka, nomukalo hava taalele eleshelo, naashi tava ti, noshu tuu. Ndele omunhu keshe oku na omukalo waye mwene wokuudifa. Ou weteko, Kalunga ine tu shita atushe tye lifa. Ye okwe tu shita twa yooloka. Ye okwe tu shita twa yooloka momifika detu. Ye okwa shita unyuni wa yooloka, neemhunda dakula, eemhunda dinini, omalundu, eembuwa, eengala dakula ditoka, eengala dimbulau, nomaludi aeshe a yooloka. Ye okwe tu shita ashike twa yooloka. Opuwo. Ye okwa shita omutwe u tilyana, nomitwe dilaula, omitwe dindjibi, omutwe u toka; twa ondoka, twa pwelela, tu vale, akutu, nakeshe tuu. Uwete? Ye okwe—Ye okwe tu shita twa yooloka. Kalunga oKalunga komaludi. Ndele ondi shi hole shi li ngaho. Ku shi hole? [Eongalo tali ti, “Amen.”—Sd.] Ashike oshinima shelifa efimbo alishe? Akutu! Akutu! Ondi shi hole.

²⁴ Hano natu pandjuleni paife mOmishangwa detu, lwomEmbo lOmuyapuki Mateus, Evaengeli lOmuyapuki Mateus, oku hovela

no . . . Novelise oni4, onda hala oku lesha o . . . oku lesha eleshelo, Omwene ne tu kwafe. Omuyapuki Mateus, ekapiteli eti4.

Onda itavela, manga inatu lesha, natu ilikaneni.

25 Tate Omukwaulu Omunefilonghenda, natango nomitima danyakukwa ohatu taalele omudo mupe ou. Ndele otwe Ku taalela noku eta kwOove oisho yetu aishe yonale, nohatu indile opo U i tule mefuta lokudimbwa, ndele ino alulila vali omatimba etu. Ndele inatu tala ashike oukali woukwamhepo wetu, ashike wetu . . . natu tale okwoongala kwetu naOve. Ndele tu dimina po omatimba etu aeshe. Ndele ohatu indile opo Omhepo Yoye i longe nafye konguloshi. Ndele nge ope na sha inashi yela mufye, Omwene, shi twala kokule ngaashi oushilo u li kokule nouninginino. Shi umbila mefuta lokudimbwa, shihe tu alulilwe vali, opo tu dule oku ya momudo ou mupe, twa yela, twa koshwa nOhonde yOdjona, noku lilongekida.

26 Omudo ou 1960 nau kale omudo muwa lela oo hatu Ku longele naana. Tu pa shihapu, shawanenena. Oiongalele aishe oyo i li metifa, Omwene, oyo hatu diladila naMumwatate duPlessis, nomounyuni aushe, muAsia, naamushe moEurope, naamushe—naamushe mushe. Omwene, nashi kale ehalo Loye nEenghono Doye odo di tu wilikile koinima oyo. Ndele nge ope na efimbo lasha hatu di mondjila ya nunwa yOukwakalunga Woye, Omhepo Iyapuki nai indike mondjila noku tu kangheka, Omwene, noku tu alulila monhele ya yuka. Shi wanifa.

27 Yambeka ongeleka ei inini, Omwene. Hanga, i li po omido omilongonhatu, ndi wete, oya fikama apa paife, onga edimbuluko efilonghenda laKalunga, kovanh u ve lininipika. Ohatu ilikana, Tate, opo U yambeke Mumwatate Neville, omufitaongalo. Yambeka ongeleka aishe. Yambeka ovadiinini voiniwe, ovadiakoni, omuwiliki womaimbilo, omushikixumba, novakwaneongalo aveshe, keshe umwe, ovalongi vofikola yOsoondaxa, nakeshe tuu. Omwene, natu dule oku kula omudo ou mefilonghenda laKalunga. Ndele oukwashilyo wetu nau kule momuvalu munene, ne—nefilonghenda Loye, opo, eshi sha kala momido dapita. Shi wanifa, Tate.

28 Paife tu kwafa ngaashi hatu taalele eleshelo olo tu li pokulesha, Ondjovo Yoye. Ndele Oove auke, Omwene, to dulu oku fatulula nohatu ilikana opo U tu shi wanifile, molwa Ouhamba waKalunga. MEgina laJesus Kristus. Amen.

29 Onda shiivifa ashike paife eshi nda hoolola molwa eleshelo okafimbo kashona ta ka shikula. Otau hangika mOmushangwa apa, nohandi u lesha. Otashi ifanwa, onda hala oku shi ifana, “okudja efimbo olo.”

30 Inandi diladila, onda ti onguloshi inya, ka kwa li ndi na oku uya ko, molwaashi kutya omunino wange owa li tau xwexwema. Ndele omwalikadi wange okwa ti kwaame onghela, ile onghela inya. Ta ti, “Hano ondi wete kutya ito i kongeleka.”

31 Ndele onda ti, “Muholike, nghi shi wete. Omunino wange otau luluma unene notau xwexwema.”

32 Ndele hano, oufiku ngoo oo, eshi ndi li omutumba noku kufa Omushangwa, onde litwa mwaOu.

33 Mumwatate Sothmann okwe uya po. Okwa ti, “Oto i kongeleka mongula konguloshi?”

Onda ti, “Eheno. Oko handi kala.”

34 Ndele Meda okwa tala kwaame, ndele ta ti, “Nghi ku udite ko.”

Onda ti, “Inandi teelega u udenge ko, uwete,” onda ti, “ile ha umwe nokuli.”

35 Kape na umwe oo ta wilikwa kOmhepo yaKalunga ta udika ko.

36 Omwene wetu, inave Mu udako. Ye okwa monika a fa Ye ta popi omukalo umwe, omunute umwe; nomukalo mukwao, omunute mukwao. Ndele kumwe kulili Ye ota popi shimwe shilili. Fimbo limwe osha li Jesus ta popi, efimbo likwao osha li Kalunga ta popi. Ou wete? Nokuli ovalongwa ova ti kwinya, xuuninwa, tava ti, “Tala, paife Oto popi shayela. Paife otu udite ko.” Uwete?

37 Ndele Jesus okwa ti, “Omu udi-. . .Ndele paife omwa itavela?” Uwete, konima yaasho.

38 Ito dulu ashike oku shi ninga, molwaashi owa wilikwa kOmhepo. Ndele to tameke to ningi sha, oto mono mo kutya ou wete wa. . . Kalunga okwa hala e ku longife kumwe po. Ou noku kanghama *apa* noku ya *kwinya*, wa wilikwa ashike kOmhepo. Ovanailongo, ovanhu velili ovo ve na onghalamwenyo oyo wa hala oku yandja kuKalunga.

39 Ndele hano alushe ohandi ti ngaha, “Ohandi shi ningi Omwene nge e shi hala.” Uwete? Nge onda ninga eudaneke kumwe, “Ohandi shi ningi Omwene nge e shi hala.” Uwete? Ndele nee, hano, nge kashi fi ehalo lOmwene, ohandi kala. . . Ohandi popi Etumwalaka eli Omwene nge e shi hala. Ye ota dulu oku ifana nge, mEtumwalaka lela eli, ndi ye koCalifornia. Ohandi tula kesheshimwe pomunghulo noku ya koCalifornia, handi endelega ngaashi handi dulu.

40 Ndele osho nda hala oku kala ngaho. Inandi hala sha shi shunife nge pedu. Inandi hala oshinima shinene shakula ile shikwao, osho shi na ongushu yeedola eemiliona, nou na oku kala u na oimaliwa ihapu unene, keshe fiku, oku manga nge. Onda hala oku kala, apa, eshi Kalunga a ti, “Onda hala u ye kwinya kovanhu ava. Ope na ashike vatano. Ashike inda ko ashike, noku kala ko fiyo handi ku lombwele uye.” Onda hala oku ya ko. Ndihe na omainda, ashike. . . nonge Ye okwa hala ndi ye kondje yomafuta.

41 Paife osho ngaha, sha tumbulwa, oku ya kOndowishi, ile ko—koAfrica. Ndele omukainhu umwe omunamiliona, efimbo ashike olo Omhepo tai shi tula mwaame ndi ye koAfrica, okwa ti, “Ohandi yambidida olweendo noku futa keshe kamwe kasho.” Uwete? Opuwo. Omolwashike ndi noku lipula kombinga yoshimaliwa naikwao, ngeenge Tate wange aishe oyaye? Uwete? Ye ota dulu oku popya nomunhu ou omuyamba, ile omunhu oo omuyamba, ile ovanhu ava, ile ovanhu ovo, noka pe na omhumbwe yange ndi shi lipule. Uwete? Kalunga ote shi file ashishe oshisho.

42 Mumwatate Roy, oo omukalo oku kala. Mu efa ashike eshi takamife. Oshiwa unene.

43 Paife natu pandjuleni mOmishangwa detu, kekapiteli eti4. Ndele natu hovele oku—oku lesha, lwopovelise oni12 yekapiteli eti4 lEvaengeli paOmuyapuki Mateus.

Paife eshi Jesus a kala . . . Ndele paife eshi Jesus a uda kutya Johannes okwa tulwa modolongo, okwa shuna kuGalilea;

. . . tembuka muNasaret, okwa ya noku kala muKapernaum, shi li pefuta, omomikunda daSebulon nodaNaftali:

Opo di wanifwe odo da tongwa komuxunganeki Jesaja, ta ti,

Edu laSebulon, nedu laNaftali, lopefuta, langhele kwinya yaJordan, Galilea yOvapaani;

Ndele oshiwana osho sha li omutumba momilarulu osha mona ouyelele munene; navenya va li va kala omutumba moshilongo nomomudidimbe wefyo ouyelele we va yelela.

Okudja efimbo olo Jesus okwa hovela okuudifa, nokutya, Lidilululeni: osheshi ouhamba weulu owa ehena popepi.

44 Onda hala oku popya moshilongwa: Ndele Okudja Efimbo Olo. Ou weteko, onga omunhu, atushe ohatu diladila oinima okudja pefimbo lonhumba. Shongadi noshongadi sha ningwa, ndele okudja efimbo olo. Ndele paife, oikando ihapu, oto shakeneke omulumenhu omukulupe ile omukainhu omukulupe, ndele ove hole oku yukifa konima kefimbo oshinima shaningwa, opo ve shi tofemo noku ty, “Osha li pefimbo olo.”

45 Paife, ondi wete kutya atushe konyala apa, konguloshi, ohatu dulu oku dimbuluka, edimbuluko loinima yonhumba oyo ya ningwa pefimbo lonhumba. Okudja efimbo olo, shimwe osha lunduluka. Oshinima *shonhumba-no-shonhumba*, osha ningwa efimbo olo. Ndele okudja efimbo olo, osha yooloka. Ndele oshinima shiwa kutya ohatu dulu. Ndele omadimbuluko amwe aa, oinima oyo hatu diladila, oinongushu yoinima oyo ya

lunduluka. Ndele ope na oinima imwe oyo ihe na ongushu oku diladilwa.

⁴⁶ Onga oshihopaenenwa, nge omukainhu ina tumbala, kutya okwa ti, “Opa li efimbo olo nda li ndi muwa, omuyuki, okakadona komikalo. Ndele oufiku wonhumba, ile onhele yonhumba, oshinima shonhumba osha ningwa.” Ndele okudja efimbo olo, okwa kala mondjila yapuka. Onghalamwenyo yaye oya kala ya tukwa koulunde, noulaulu nomulaulu, ndele epangulo ashike le mu teelega. Ashike ota ka dimbuluka, okudja efimbo olo lonhumba, osha ningwa eshi a kufa ondjila yapuka.

⁴⁷ O—omulumenhu a kolwa, konguloshi, mepandavanda, oo ta kendabala oku nwa a kufe po oluhodi laye. Oto dulu oku mu yambula po. Ngaashi nda li petala apa, efimbo lonhumba la ya, moNew York, mondingandinga inene yeengholwe. Onda li handi ende nomulongi wonhumba. Ndele ope na omulumenhu a nangala, akutu, ovalumenhu vahapu, va yahamekwa, vehe na ekwafo lasha, va nangala penya noikutu yavo ya tuta komesho, ne—neendjedi davo moipala yavo, ndele ove li monghalo ii. Ndele ova li lela va yahamekwa.

⁴⁸ Ndele omulongi ou okwa ti, “Yambula po oo, noku mu pula.”

⁴⁹ Ndele onda ya komulumenhu ou a li a nangala neemhadi daye da tavakana kombabala yotuwa, nomutwe waye pedu mepandavanda, ndele opo ina dula oku—oku—okudja po poshikando, a ye keenduda dokufuda po. Akutu, okwa li e li monghalo ii. Ndele onde mu kwata, ndele handi ti, “Oto dulu oku popya?” Ndele ina nyamukula nge sha.

⁵⁰ Hano omulongi okwa ya ko. Oku shii shihapu nhumbi ta longo naye. Ndele te mu pula, “Oove lyelye?”

⁵¹ Ndele lwaxuninwa okwe mu pendula nawa, fiyo ta ti, “Nge oto landele nge okunwa!” Ndele otwa mona kutya, ota u like omunwe kombaanga oko kwa li e li omuperesidente wayo.

⁵² “Iya,” okwa ti, “fye ovaudifi. Lombwele nge kutya oshike sha ningwa po?”

“Nge owa udanekele nge okunwa!”

⁵³ Iya, itatu dulu oku shi ninga. Onda ti, “Itandi dulu oku weda oluhodi koluhodi loye. Onda hala oku ku kwafa.”

⁵⁴ Ehokololo laye alishe. Okwe uya keumbo, oufiku umwe, ndele opa li, oo ha ifana, o “Muholike John” ombapila po—poshitaafula. Hano, omwalikadi waye okwe mu fiya po. Ndele oku na . . . Oku mu hole. Ndele okwa ya nounona vaye. Ndele okwa hengwa, ndele okwa ya nomulumenhu mukwao. Ndele ta ti, “Nghi shii kutya nandi ninge ngahelipi, oku yasha mo ouluvi wange, ile oshike ndi ninge. Onghee onda—onda ya kenwino.” Ndele okudja efimbo olo, oye ngaho. Osho shi li ounyuni aushe.

⁵⁵ Omunaipupulu. Oto dulu oku kufa umwe, ngaashi nda ti komulumenhu, efiku limwe, oo kwa li ndi shii ota popi

omashendjo. Ndele onda mona mo, kutya, okwa popya oipupulu ihapu unene fiyo te i itavele, yemwene. Ndele onda ti, “Oshike she ku ningifa ngaha?” Ndele onda kala omutumba ndi popye naye. Onda ti, “Onda hala oku ku pula sha. Omahokololo aa okwa nyika unene ousondolo ovanhu ve a itavele.”

⁵⁶ Okwa ti, “Wotete ohandi dimbuluka nde u popya.” Okwa ti, “Onda li okamatyona oko ka tekulwa meumbo liwa.” Ndele okwa ti, “Onda dja mo noku shila oshitetela shokasekeleta, ndi kale ashike nda kotoka. Ndele handi li okofi, opo ndi shi kufe mo momufudo wange.” Ndele okwa ti, “Onde shi ninga nale konima yoluungu likulu, konima yeumbo.” Ndele okwa ti, “Itandi dimbwa nande, eshi meme a kwata nge, ndele ta ti kwaame, ‘Mumwangemati, nandi nyike omufudo woye.’ Ndele handi fudile omufudo wange moshipala shaye, ndele ta ti, ‘Owa lya okofi u kufe mo sha momufudo woye. Owa kala to ningi shike? Owa kala to shili ousekeleta?’”

⁵⁷ Ndele ta ti, “Shimwe osha lombwela nge ndi mu lombwele oshili.” Okwa ti, “Ashike onda ti, ‘Ahawe, meme. Onda pata omutima wange. Inandi shila ousekeleta.’” Okwa ti, “Ndele okudja efimbo olo, oshe shi tamekifa.”

⁵⁸ Atushe ohatu dulu oku mona sha osho—oshu sha hovela pefimbo lonhumba. Ndele okudja opo, oinima oya lunduluka. Ndele ope na oinima ikwao i na ongushu oyo hatu dulu oku diladila. Ovanhu ve na omahalo awa ova kendabala oku tameka oinima ipe, oku ninga oinima pefimbo lonhumba.

⁵⁹ Onga oshihopaenenwa, eshi olusheno la monika tete kuBenjamin Franklin, nova li tava dulu oku li kwata ko. Ova hovela oku tya, “Okudja efimbo eli, itapa ka kala vali oita. Molwaashi, kutya, olusheno eli otali dulu oku tulwa komaluumbo, neenghono di li pombada ngaha, fiyo kape na omunhu ta dulu oku li tauluka.” Ova tonga nawa.

⁶⁰ Ndele lela konima yOita yOtete yOunyuni, eshi—eshi Kaiser Wilhelm a shanga eudafano lombili. Otwa lombwelwa omu moAmerica. Onda li okamati komido hanga omuwoi. Ashike ohandi dimbuluka ovanhu aveshe tava ti, “Itatu kala vali tu na oita ikwao. Okudja efimbo eli, oshapwa, fiyoalushe.” Ashike otu na oita ikwao.

⁶¹ Ndele eshi oU.N. inene Ile, ndi tye, manga osho, ova tunga po osho sha li hashi ifanwa Eamafano lOshiwana. Ndele tava ti, “Paife itatu kala vali tu na oita, molwaashi otu na Eamafano lOiwana olo tali shave ounyuni. Ndele nge ope na sha tashi uya kumwe po, ovalumenhu ava ova dja mukeshi oshiwana otava i ko noku tonatela ounyuni.” Ashike osha li edopo. Ova twikila noku kala ve na oita. Ndele oU.N. otai ningi oshinima shelifa.

⁶² Otwa lombwelwa paife etengeneko kutya mongula oufiku ile Osoondaxa oufiku. . . Omulumenhu elifa oo a tengeneka oPearl Harbor, pefimbo lela opo e—eedila tadi i bomo po, ta ti, kutya,

“Osoondaxa oufiku pomulongonambali komutwe, kutya oitwa omilongoheyali nanhano yovaAmerica otava ningi omute, kutya Russia ota bomo Omapangelo Ahangana, oufiku wOsoondaxa ei tai ya pomulongonambali komutwe.” Omulumenhu elifa oo a tengeneka Pearl Harbor. Itave shi pitifa mo, shaashi ovanhu otava kala va ye eemwengu. Inandi shi itavela. Uwete? Ahawe. Molwaashi, ita dulu oita yoatomika. Shimwe osho sho shihalwifwi shavo, omukalo *ou*, ohatu va umbile omukalo *oo*, ndele ounyuni otau hanauka. Shimwe oshi noku ningwa, natango, manga Jesus ine uya. Oshi li mondjila.

⁶³ Onga oshihopaenenwa, ovanyasha ovalihomboli. Opa li efimbo olo va hombola. Ndele ova—ova tula eano lavo kumwe. Ndele tava ane, kumukwao, oudiinini wavo. Ndele ova ti, kutya, “Ohatu holafana, efimaneko noku papatelafana, shama atushe tu li momwenyo.” Ashike ope uya efimbo olo shimwe sha ningwa po.

⁶⁴ Oinima aishe ei i li po, ope na efimbo eshi shimwe sha ningwa po. Ndele pamwe eano lavo alishe, neamafano loiwana alishe, nosho tuu, pamwe omahalo ve na omawa, ashike aeshe okwe uya pexulilo. Aeshe okwa ngumauka po, koshi ye—ye—yeemhadi domunhu. Nomahalo aeshe mawa hatu dulu oku kala tu na, ashike aeshe oku na oku uya pexulilo.

⁶⁵ Ashike ope na efimbo olo omunhu te uya kushimwe shOukwaalushe. Osho ngeenge, omunhu, efimbo omunhu ta shakeneke Kalunga. Osho ngeenge shimwe ta shi ningwa osho shOukwaalushe.

⁶⁶ Ohatu ningi omapuko etu. Ndele ohatu ningi eano letu oufiku mOmudo Mupe, oku a teya efiku lashikula ko. Ohatu pandjula omapandja mape, noku tula po eano. Ndele hatu i kovapristeli no. . . Ihatu shi ningi, ashike Katoolika ohe shi ningi. Noku ninga elihepaululo, noku shanga eano, ndele hatu uya koaltari noku pandjula omapandja mape, ashike aishe oyo ngaho. Osheshi, oshikando shashikula umwe te tu lyata keemhadi detu ile sha, efulauko likulu ota li tukile mo vali. Keshe efimbo olo tu li moupyakadi ile sha, ota shi ningwa vali.

⁶⁷ Ashike ope na onhele oyo omunhu ta dulu oku uya, pefimbo, osho tashi mu lundulula fiyoalushe, mOukwaalushe. “Ou te uya kwaAme, Itandi mu kandula po,” Jesus ta ti. Omunhu ote uya kuKalunga, ndele efikilo laye alishe lOukwaalushe tali lunduluka. Ndele omunhu ota dulu oku shakeneke Kalunga, ndele ita kala vali elifa. Ito dulu oku shakeneke Kalunga noku kala omunhu eshi wa li. Nge owe Mu punguluka, oto kala omunhu wa naipala shidulife wa li nale. Nge owe Mu tambula, oto mono Omwenyo waAlushe, ndele Ye ote ku nyumuna mefiku laxuuninwa, paudaneko Laye.

⁶⁸ Opa li efimbo eshi pa li omulumenhu ha ifanwa Abraham, ou a dja mOvakaldea, noku kala moshilando shaUr. Ndele

okwa li omulumenhu omuyuki, omulumenhu muwa. Tashi dulika, pamwe okwa li e na...Xe yaye tashi dulika he linyongamene oikalunga, shaashi ova dja koBabilon. Ndele okwa li omulumenhu wongaho, nokwa li ta kulupa. Okwa li e nomilongoheyal nanhano, nomwalikadi waye omilongohamano nanhano.

⁶⁹ Ndele Abraham, efiku limwe, eshi pamwe a li mepya, moukongo ile keshe tuu osho a li ta ningi, ta likola omandjebele, ile keshe tuu eshi oilonga yaye ya kala, okwa shakeneka Kalunga. Ndele okudja efimbo olo, okwa lunduluka. Okwa ifana oinima oyo ya ha li po, onga ilipo, molwaashi okwa shakeneka Kalunga. Okwa shiiva omunute notundi oyo a shakeneka Kalunga. Oshe mu lundulula. Ndele Kalunga okwe mu ifana a kale xe yoiwana ihapu. Ndele okwa itavela Kalunga nokwa itavela eudaneko Laye, molwaashi okwa shakeneka Kalunga. Konima yomido omilongombali nanhano, ova li tava kundafana, tava kendabala oku mu yoolola, tave mu lombwele kutya okwa itavela oshinima shapuka. Ashike Ombibeli oya ti, "Okwa nghonopala efimbo alishe, ta yandje ehambelelo kuKalunga." Molwaashi, okwa shiiva kutya Kalunga oku noku diinina eudaneko.

⁷⁰ Osho shi li ngeenge omunhu a shakeneka Kalunga. Ohashi lundulula oku kala kwaye. Ohashi mupe eliudo lopombada. Ngaashi kwa li handi popi oufiku umwe, omunhu wopaushitwe oku na ashike omaliudo atano. Ashike, omwiitaveli, ngeenge a shakeneka Kalunga, oha mono oinima ya yooloka. Eliudo lopombada olo ha li mu yambula kombada yomudidimbe. Ohashi mu itavelifa oinima oyo itai dulu oku wanifwa. Natango okwa itavela tai wanifwa, molwaashi Kalunga osho a ti. Ngeenge omunhu a shakeneka Kalunga, shimwe ota shi ningwa po.

⁷¹ Opa li efimbo eshi omunhu a deulwa mounongo aushe, outeolohi aushe wOndjovo yaKalunga. Okwa li e I shii nawa koshitwa. Okwa fikola. Oku na eedegree adishe. Okwa li a kotoka nafiyo ta dulu oku longa ovalongelwe vOvaegpiti novalongi vavo. Aishe oku i shii, koshitwa. Ashike omumbada nasho, oo a li ta faduka po, ta i konima yombuwa nokwa li ta lifa oufita weedi domunailongo. Ashike ope uya efimbo olo eshi Kalunga e mu shakeneka ko, moshixwa sha xwama. Nokudja pefimbo opo, Moses okwa lunduluka, molwaashi okwa shakeneka Kalunga moshixwa sha xwama. Ndele oshipala noshipala naKalunga, ina kala vali elifa.

⁷² Ngeenge omulumenhu ile omukainhu. . . Nghi na ko na sha kutya omaano angapi wa ninga, ile omapandja mape angapi wa pandjula. Nafiyo wa shakeneka Kalunga, ito lunduluka. Ashike ngeenge wa shakeneka Kalunga lumwe, hano owa lundululwa fiyoalushe.

73 Inashi lundulula ashike Moses. Osha lundulula Israel. Osha lundulula Egipiti. Osha lundulula ounyuni pefimbo olo, molwaashi omunhu umwe okwa shakeneka Kalunga noku Mu kufa paOndjovo Yaye.

74 Eshi twa pumbwa nena oumwe a shakeneke Kalunga, oshipala noshipala, noku popya naYe, onghalo. Ngeenge ovanhu va shakeneka Kalunga, oinima oya lunduluka. Filufilu. Oo auke omukalo hatu dulu oku kala tu noinima.

75 Ndele okudja efimbo olo, Moses omumbada, Moses ou a li ta faduka po, okwa lundululwa. Ndele okudja efimbo olo, okwa ninga omupiya wOmwene. Osho alushe ha shi longo ngaho. Ngeenge omunhu a shakeneka Kalunga, oinima oya lunduluka.

76 Opa li okakadona kashona efimbo limwe, kehe dulife pomido omulongonahetatu, ile pamwe kehe fike po, oko ka li ke li mondjila yako kondungu ongula imwe, oku ka tala evela lomeva, mwinya muNasaret. Okwa li okakadona kashona kawa. Oka itavela. Okwa li ke neitavelo. Ashike, ongula oyo, oka shakeneka Kalunga. Ndele Kalunga okwe ka lombwela sha, noke shi itavela. Ndele osha lundulula olweendo alishe longhalamwenyo yomukainhu, noku mu ninga omuhaxulepo. Edina lako ola li Maria, ina yOmwene wetu Jesus. Omukainhu munini okwa li ashike okakadona kanini kongaho, ashike oka shakeneka Kalunga. Nokudja efimbo olo, shimwe osha ningwa. Filufilu.

77 Opa li omulumenhu wedina Petrus, omuyuli weeshi a kindja, tashi dulika va xwalakata eshi tave uya. Ndele otashi dulika kwa li omushili akula womungwenyauki. Molwaashi, apa efimbo lapita, onda mona oshinyandwa, sha ifanwa, “Omuyuli weeshi akula.” Onda lipula sha li endjadjukununo liwa unene laPetrus, molwaashi okwa li omukwetu a kula a kindja. Ka li e na ko na sha. Ina itavela nande osha. Ashike, efiku limwe, okwa shakeneka Kalunga. Ndele okudja efimbo olo, okwa lundululwa. Okudja efimbo olo, okwa ninga omuyapostoli wOmwene Jesus Kristus.

78 Ngaashi Mumwatate David duPlessis a li te tu lombwele efimbo la ya, kombinga yaSaul wokuTarsus, omudipai, ou a kwata ondjafa yovadipai, ovo, noku ninga oundombwedi, noku ninga oundombwedi yefyo laStefanus omufili weitavelo. Okwa li e na eembapila mondjato yaye, a ye ko—kovakulunhu veengeleka, noku manga ovanhu ovo va li tava ningi eweelelo lihapu, noku ingida, noku hambelela Kalunga. Okwa li omulumenhu munene komesho yOvafarisai. Okwa li Omufarisai womOvafarisai. Ashike, efiku limwe, okwa li e li mondjila yaye yoku ya kuDamaskus, ndele ta shakeneke Kalunga. Ouyelele owe mu minikila. Ndele okudja efimbo olo, ka li vali Saul wokuTarsus. Ashike okwa li Paulus, omulinipiki, omunaneni, molwaashi okwa shakeneka Kalunga, noShe mu lundulula.

⁷⁹ Opa li omunashilundu a nangala poshivelo. Oixwepopaleki aishe yomiti inai mu velula. Oipute yaye ya ola oya ninga ihapu fiyo omake aye itaa yeluka, vali. Ndele eemhadi daye, ita dulu oku di pweda. Onghalo yaye kai na elineekelo lasha. Ashike okwa shakeneka Kalunga, fiku limwe, ta dilile komuvelo. Ndele okwa wila pedu noku linyongamena, noku tya, “Nge Owa hala, Ove to yelifa nge.”

⁸⁰ Ndele Ye okwa ti, “Onda hala. Yela.” Ndele okudja efimbo olo, ka li vali noshilundu, molwaashi okwa shakeneka Kalunga.

⁸¹ Opa li omulumenhu omupofi e li omutumba ponghulo yondjila. Ndele ka kwa li ta tongola ouyelele komulaulu. Kapa li sha tashi dulu oku mu kwafa. Efiku limwe, Umwe okwe uya ta di moshilando shaJerico, ndele eshi a shakeneka Kalunga; nokudja efimbo olo, okwa mona ko. Etwikuluko ole mu hanga. Etwikuluko louyelele ola twiyukila momesho aye, nokwa mona ko vali. Molwaashi, okudja efimbo olo, eshi a shakeneka Jesus, okwa li omulumenhu a yooloka. Okwa twikuluka.

Ngeenge omunhu a shakeneka Kalunga, shimwe oha shi ningwa po lelalala.

⁸² Opa li omulumenhu omunyasha, fimbo limwe; kape na elimbililo, odalele iwa yomoshilongo, ashike omafingo okwe mu hanga. Ndele okwa li mwii fiyo odolongo yeumbo itai dulu oku mu idilila. Ndele ove mu manga nomalyenge. Ndele oku nongudu yeendemoni, muye, fiyo ta dulu oku tokola omalyenge noku limangulula mo. Ndele eendemoni ode mu shingila moluumbo lomayendo, omo a kala. Noku kufa omamanya ndele, noku ninga nonyanya unene, ohe lilengaula yeemwene. Akutu, okwa li mukwetu mwii. Eshi omafingo e mu dja, kape nonghumwe ta diladila, “Ohandi ningi shike apa?” Ndele lwopefimbo olo, eendemoni ode mu alukila, noku mu lengaula noku mu pombaula. Ashike, efiku limwe, okwa shakeneka Jesus. Ndele okudja pefimbo olo, omunanamwengu wokuGadara oku na omadiladilo aye, a djala, e li omutumba peemhadi Daye. Ota shuna keumbo, ngaashi omulumenhu wonghedi. Ota shuna keputuko. Ota shuna kovaholike vaye, nota dulu oku tya, “Okudja efimbo olo, onda lunduluka.” Ehen.

⁸³ Opa li efiku limwe, kwinya kuKalvali, eshi Kalunga nefyo va shakena, oshipala noshipala, eshi Omwenyo nefyo ye uya pamwe. Ashike osheshi Omwenyo, Kristus, a shila mo oshitwifo mefyo. Ndele okudja efimbo olo, efyo ka li na vali oshitwifo mulo. Onde shi hafela unene. Kalunga! Efyo naKalunga va shakena, pamwe. Efyo ina li lifa vali. Ka li na oshitwifo kulo paife. Ovaitaveli Ovakriste otava ende ve li yukilila moshipala nokutya, “Akutu efyo, oshitwifo shoye oshi li peni? Ombila, efindano loye oli li peni?” Omolwashike? Aveshe ova shakeneka Kalunga. Inave lifa vali hano.

⁸⁴ Kape nomunhu ta kala elifa, kape na sha tashi kala shelifa, lumwe nge osha shakeneka Kalunga. Ito kala welifa.

⁸⁵ Ohandi dimbuluka nda nangala apa mombete yoshipangelo. Eendokotola oda pa nge ominute nhatu oku kala nomwenyo. Omutima wange tau denge, oikando omulongonaheyali momunute. Onda shakeneka Kalunga. Okudja opo, inandi kala nde lifa. Shimwe osha ningilwa nge. Kape na ou ta lombwele nge eyooloko lasha. Bill Branham okwa fya. Onda shakeneka Kalunga, ndele Shimwe oshe uya mwaame. Inandi kala vali nde lifa okudja pomunute oo nde Mu shakeneka. Ye okwa lundulula nge. Ye okwa ninga nge shimwe sha yooloka. Ka sha li oku ninga eano lOmudo Mupe, ashike onda shakeneka Kalunga.

⁸⁶ Ovalumenhu novakainhu, ngeenge mwa shakeneka Kalunga, omwa lunduluka. Ohatu ningi eano letu konguloshi yOmudo Mupe; to shuna ko mongula ongula, oku a teya; efiku lashikula ko, oku a teya. Ashike eshi twa pumbwa oku ninga, ha eano lOmudo Mupe, ashike otwa pumbwa oku uya oshipala noshipala naKalunga, noku kala nOmwenyo waAlushe, oku dalwa kOmhepo Yaye.

⁸⁷ Opa li omulumenhu omukulupe, efimbo limwe, ndele ita dulu oku ninga etokolo laye. Omunawii okwa twikila oku shi denga mo muye. Efiku limwe, mepya, okwa twa eengolo a ilikane. Fimbo kwa li ta ilikana, okwa pwedela po oshifidi. Okwa ti, “Eshi nashi kale edimbulukifo. Satana, nge owa a lukile nge vali, ohandi ku ulikile koshifidi eshi. Ohandi ku lombwele kutya apa onda shakeneka Kalunga, ndele osha pwa oku dja opo.” Osho twa pumbwa, pamwe ha oshifidi mepya, ashike kumwe po, oku likalela komeholeko kumwe, onhele imwe. Ha o . . .

⁸⁸ Akutu, konguloshi, ope na omaano lwomafele taa kufwa, omayovi taa kufwa. Ndele omudo washikula ohatu a kufa aeshe, natango. Hatu ti, “Ohatu efa po oipupulu. Ohatu efa po oku ninga *eshi*. Nohatu lidula efulakato letu. Ohatu ningile Kalunga shihapu. Ohatu ningi *eshi*, ile *osho*, ile *shikwao*,” oku mona mo ashike kutya, oshongaho.

⁸⁹ Ashike omunhu eshi a pumbwa oku ninga, konguloshi, oku uya oshipala noshipala naKalunga. Ndele okudja opo, oye omushitwa a lunduluka. Halleluya! Akutu, nda hala ngeni ohandi shi popi omukalo oo nde shi itavela. Ashike ngeenge omunhu a shakeneka Kalunga, okwa lunduluka, okudja omunute oo, omafiku aye aeshe. Ita kala vali elifa, molwaashi oku na Omwenyo waAlushe. Omushitwa mupe. Oinima ikulu oya xula po, noinima aishe oya ninga ipe kuye. Ota monika mupe.

⁹⁰ Omunhu tavele ota dulu oku ya koshipala shaKalunga, ngeenge eendokotola da ti, “Ota fi.” Ashike ota dulu oku ya koshipala shaKalunga, noku yandja oshiningwanima shaye. Ndele te uya yo, omunhu a yooloka, nokudja efimbo olo.

⁹¹ Akutu, ohandi dimbuluka Congressman Upshaw, e li omutumba mokatamba omido omilongohamano nahamano. Oufiku oo, kwinya moCalifornia, eshi Omhepo Iyapuki ya kuluka, noku hovela oku popya, okwa shakeneka Kalunga. Ndele okudja opo, okwa dula oku enda ehe na omamango.

⁹² Onda mona efimbo apa ovanhu vokaangela va nangala, vehe na sha ashike omudidimbe ashike. Ndele eendokotola oda pita po noku tya, “Ova pwa.” Ovaholike vavo va ongala mo, oku tonga oitya yaxuuniwa oyo tava dulu, ku vo, etwomukumo. Ashike ova shakeneka Kalunga, ndele, okudja efimbo olo, ova lunduluka. Ova kala va yooloka.

⁹³ Ondi wete omukainhu a nyata, mwinya mepandavanda. Ondi wete ongholwe, mwinya momukala. Ondi wete omunaihelele, mwinya mongeleka. Omaludi ovanhu aeshe aa, keshe Omudo Mupe, tava pandjula epandja lipe, noku kendabala oku ninga oshinima sha yooloka, tava kendabala oku tungulula nosho tuu. Nava shakeneke Kalunga, efimbo limwe, nokudja opo.

⁹⁴ Jesus okwa udifila ava nokudja opo, ovo ve li moiwana yomudidimbe wefyo.

⁹⁵ Ndele onda ti, konguloshi, nge omunhu okwa hala elunduluko shili muye, ne uye oshipala noshipala naKalunga, noku Mu shakeneka oshikando shimwe, hano ota ti, “Okudja opo, okudja efimbo olo, ame omunhu nda lunduluka. Ondi shi shii pathiivo.”

⁹⁶ Mokafimbo kashona, ongeleka otai ongala apa poaltari. Ta mu yandje eenghalamwenyo deni, moupe. Ta mu efa po oinima, noku tula oinima koaltari. Mumwatate, nandi ku pe omayeke amwe. Nge ino shakeneka nale Kalunga, oshipala noshipala, nandi ku lombwele sha. Kala koaltari oko. Kala ko ashike nafiyo to shakeneke Kalunga, hano u dule oku ulika omunwe konima konguloshi oyo yOmudo Mupe. Ha, noku tya, “Onda pandjula epandja lipe. Onda ninga eano lipe.” Ashike, “Okudja efimbo olo, onda shakeneka Kalunga. Nonghalamwenyo oya lunduluka, noinima oya yooloka. Ndele kesheshimwe osha ninga shipe, kwaame, vali, okudja efimbo olo,” efimbo wa shakeneka Kalunga.

⁹⁷ Kashi fi, oku shakeneka Omudo Mupe. Ohatu ke shi taalela, mominute dishona. Konima yefimbo, lwetundi mbali netata, ndi wete. Pamwe dishona di dulife po. Ohatu shakeneke Omudo Mupe, oshipala noshipala. Ohatu u shakeneke nomaano. Ohatu u shakeneke nepandulo. Ohatu u shakeneke nehala liwa. Ohatu u shakeneke, hatu ti, “Ohatu kendabala oku pandjula epandja lipe. Ohatu kendabala oku ninga sha yooloka.” Ashishe osho oshi li nawa. Onde shi pandula.

⁹⁸ Ashike mumwatate, itashi kala Oukwaalushe nafiyo wa shakeneka Kalunga, tete. Ngeenge wa shakeneka Kalunga, tete, ndele, okudja opo, kesheshimwe otashi kala sha yooloka.

Natu ilikaneni eshi hatu nyongamekeni omitwe detu.

⁹⁹ Omwene Jesus, Omona waKalunga, ohandi dimbuluka efimbo eshi nde Ku shakeneka, Omwene. Ohandi dimbuluka, epongo longaho, ndi na onghalamwenyo yonghedi iwa, itandi lotauka, nokunwa, ile oku ndobola, ile oku shila omakaya, ile nosho tuu. Ashike ondi shi shii, Omwene, eshi efyo le ya oku vaka monduda yoshipangelo oyo, omido omilongombali nasha dapita, opa li sha sha kambela monghalamwenyo yange. Opo nda shakeneka Kalunga, nokudja efimbo olo. Okudja efimbo olo, Omwene, onda kendabala oku Ku longela. Onghalamwenyo yange oya kala ya lundululwa nakesheshimwe otashi monika sha lunduluka. Onda hafa unene eshi nde Ku shakeneka, Omwene. Ndele konguloshi, twa taalela Omudo Mupe, onda hafa oku tya ohandi u taalele nOmhepo yaKalunga omunamwenyo momutima wange.

¹⁰⁰ Tu pa eshiivo, Omwene. Tu pa ouwa Woye nonghenda. Tu dimina po omatimba etu. Ndele natu kale nomwenyo momudo twa yuka, Akutu Omwene Kalunga, neshiivo, kutya otwe Ku shakeneka neenghalamwenyo detu oda lundululwa. Shi wanifa, Omwene. Tu dimina po onyanga yetu. Tula mufye Omhepo Iyapuki Yoye. Tu wilika noku tu pukulula.

¹⁰¹ Tate, Kalunga, apa 1960, ya taalela nge. Ndele ope omhito yoiongalele younyuni aushe, osho sha fa kutya nokuli omayovi omilongo lwoikando omayovi, nomayovi nomayovi ovakwadu va hawiishu, lovapaani, nosho tuu, otashi dulika ve uye kwOove. Akutu Omwene Kalunga, nOmhepo Yoye momutima wange, onda taalela oaltari Yoye, konguloshi, noku Ku taalela, noku tya, “Kwafe nge, Akutu Kalunga. Omutima wange otau pi nouladi. Ondi ku hole, Omwene. Onde liyandja kwOove, moshilonga. Wilikile nge keshe apa Wa hala oku wilikila nge. Tume nge keshe apa Wa hala oku tuma nge, Omwene. Popya ashike, ndele handi i.”

¹⁰² Yambeka ongeleka yange. Yambeka Mumwatate Neville. Yambeka ovanhu aveshe apa, ovanailongo moivelo yetu. Novafitaongalo ava tava ka popya, efimbo nefimbo, onguloshi aishe, ohandi ilikana, Kalunga, opo U yambeke oshilonga shavo. Yambeka Mumwatate Neville. Yambeka Mumwatate Junie Jackson. Mumwatate Beeler, ovalongi vakwao aveshe ava, va yambeka, Tate. Tu pa omudo muwa mo1960.

¹⁰³ Fye, Omwene, otu shi shii kutya otwe Ku shakeneka, oshipala noshipala, noku shiiva eshi tashi ti oku dalululwa kOmhepo Yoye, tu pa onghenda Yoye yaAlushe, tu Ku longele. MEDina laJesus twa ilikana. Amen.

¹⁰⁴ Ou Mu hole? [Eongalo tali ti, “Amen.”—Sd.] 1960, inashi kala, kutya, “Onda pandjula epandja lipe.” Inashi kala, kutya, “Ohandi kendabala oku tameka onghalamwenyo ipe.” Ashike nashi kale, kutya, “Onda shakeneka Kalunga, nokudja efimbo

olo, efimbo olo, ondi na ombili i dule ounongo aushe. Ondi na ehafo lihe shi oku yelekwa, nouyadi wefimano. Ondi na ewaneno. Nokuli nge efyo ole uya kwaame, ohandi kala momaoko aKalunga, omunute konima yomufudo wange wa xuuninwa wa dja mo. Kutya nee oshike tashi ya ile tashi i!"

¹⁰⁵ Nave i hanaune po, oufiku wOsoondaxa, nge ova hala. Osho va hala, oboma ita i kweywa fiyo twa ya mOukwaalushe pamwe naYe. Amen. Kape na eshi tashi tu ehameke. Halleluya!

¹⁰⁶ Onda hafa unene nda shakeneka Kalunga. Onda hafa unene handi dulu oku tya, "Okudja efimbo olo." Shi twila poshi pondodo oyo! "Eshi nda shakeneka Kalunga, shimwe osha ningilwa nge. Onda lundululwa, okudja omunute oo. Onda lundululwa, okudja nale." Onda hafa unene oku kala mondjila ei, konguloshi, onga ehokololoumbangi kOshinge nokEenghono daKalunga. Okanima kakulu apa, naKalunga okwa kulukila po noku pa nge efilonghenda Laye, noku xupifa nge, noku velula nge, noku yadifa nge nOmhepo Yaye. Ndele nandi udife Evaengeli Laye, osho efimano linene mounyuni. Okudja efimbo olo, nafiyo efimbo eli, nghi na nande ombedi yasha. Ashike onda kala noku pandula, omafiku aeshe aa, nohandi kala, mOukwaalushe aushe, kutya onda shakeneka Kalunga.

Kalunga ne ku yambeke. Eewa, Mumwatate Neville.



NDELE OKUDJA EFIMBO OLO OSH59-1231
(And From That Time)

Etumwalaka eli kuMumwatate William Marrion Branham, patamekelo layandjelwe mOshiingilisa mOshivilo shOmudo Mupe, Etine onguloshi, Desemba 31, 1959, kEtwaliongalo Branham moJeffersonville, Indiana, U.S.A., ola kufwa okudja kekwatelo lengenete teipa nola nyanyangidwa metwokumwe mOshiingilisa. Efatululo eli Oshikwanyama ola nyanyangidwa noku andjakanekwa koVoice Of God Recordings.

OSHIKWANYAMA

©2018 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Oufemba didiliko

Eemhito adishe oda kalekwa. Embo eli otali dulu okunyanyangidwa koprinta meumbo molwa elongifo lopumwene ile okuyandjwa po, oshali yovene, onga oshilongifo okuandjakaneka Evaengeli laJesus Kristus. Embo eli itali dulu ku landifwa, okwiindjipalekwa mondwanga, okutulwa kowebite, okutuvikilwa momukalo wonumba, okufatululilwa momalaka akwao, ile okulongifwa molwa eyambidido lopashimaliwa pehe na epitikilo laVoice Of God Recordings®.

Molwa ouyelele uhapu ile molwa oilongifo ikwao ili po, alikana kwatafana:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org